

WEEK 1

Lees telkens die teksgedeeltes rustig deur. As jy genoeg tyd het, lees dit meer as een keer!

DONDERDAG, 1 MEI 2014

Johannes 1:1-18

Die evangelie van Johannes begin op 'n hoogtepunt: Jesus is die Seun van God en self ook God! In en deur Hom leer ons God ken. Dit is egter nie vanselfsprekend dat mense dit glo nie. Wanneer dit wel gebeur, is dit amper soos 'n nuwe geboorte wat plaasvind. Die belangrikste middel wat God gebruik om mense in Jesus te laat glo, is die getuigenis van ander mense. Johannes die Doper is 'n voorbeeld daarvan. Mense is dus vir God baie belangrik. Só belangrik dat Hy self mens word en onder ons kom woon. Jesus se menswording het dus radikale implikasies vir ons menswees. Ons hoef nou nooit weer daaraan te twyfel dat God mense gebruik om sy werk op aarde te doen nie!

VRYDAG, 2 MEI 2014

Johannes 1:19-34

Nadat Johannes Jesus se identiteit duidelik omskryf het, is die vraag nou: wie is Johannes die Doper? Dit word op meer as een manier duidelik gemaak dat Johannes die Doper nie naastenby so belangrik soos Jesus is nie en dat sy enigste taak is om van Jesus te vertel. Johannes beklemtoon ook in hierdie verse die belangrike werk van die Heilige Gees: Die Gees help ons om te glo en te verstaan dat Jesus die Seun van God is. En omdat elkeen wat in Jesus glo, ook die Heilige Gees ontvang, kan ons ook (soos Johannes die Doper) getuig: Hy is die Seun van God!

SATERDAG, 3 MEI 2014

Johannes 1:35-51

Wanneer Jesus se bediening begin, is Johannes die Doper se taak as wegbereider afgehandel. Van nou af sou hy op die agtergrond tree. Dit word bevestig wanneer twee van Johannes se volgelingen vir Jesus as hulle nuwe Leermeester aanvaar. Dis ook betekenisvol dat Jesus sy bediening in Galilea begin, die plek waar Hy grootgeword het! Van Andreas weet ons baie min. Ons lees weer van hom in Johannes 6:8 en, volgens oorlewering, het hy 'n kruisdood gesterf. Dit is treffend dat Nataniël se aanvanklike skeptiese opmerking (Joh 1:46) in Jesus se teenwoordigheid baie gou plek maak vir 'n geloofsbelydenis (Joh 1:49)!

RIGLYNE VIR KLEINGROEPE

Vir die byeenkomste van kleingroepe gebruik ons die beeld of metafoor van 'n kuier saam met familie of goeie vriende! Ons ontmoet by wyse van spreke in die **voorportaal** waar ons mekaar vrolik groet en bly is om mekaar weer te sien. Daarna gesels ons ernstig met mekaar in die **sitkamer** rondom die Bybel. Aan 'n **eetkamertafel** vind daar dikwels diep gesprekke plaas, daarom gebruik ons hierdie fase van die byeenkoms om onder andere saam te bid. Daarna groet ons mekaar met goeie wense op die **stoep**!

Na aanleiding van die eerste drie dae se tekste, kan die volgende riglyne gebruik word vir julle weeklikse **kuier** (dieselfde riglyne kan ook deur gesinne gebruik word)

In die voorportaal

1. Gee geleentheid om te hoor hoe dit met almal gaan.
2. Vertel vir mekaar hoekom jy van die donker hou (of nie daarvan hou nie!).

In die sitkamer

1. Gesels met mekaar oor die tekste wat julle die afgelope week gelees het.
2. Laat iemand in die groep **Johannes 1:1-18** lees.
3. Sê in een sin watter gedeelte van die teks jou aandag getrek het.
4. Lees weer die teks.
5. *Die evangelie van Johannes begin nie, soos die ander evangelies, met 'n geslagsregister of 'n geboorteverhaal nie. Die skrywer val sommer met die deur in die huis: 'n entoesiastiese getuigenis oor Jesus en die betekenis daarvan vir gelowiges. Verder word Johannes die Doper se rol ook uitgespel. Daar mag geen misverstand wees oor sy identiteit nie!*

Let verder op die ooreenkoms tussen Johannes 1 en Genesis 1. Die skrywer beklemtoon daardeur die gedagte dat dit niemand minder is nie as die Skeppergod wat mens geword het! Dit het natuurlike ingrypende implikasies vir ons eie menswees

6. Gesels saam oor die volgende vrae/opmerkings:
 - a. Wat sê Johannes oor Jesus en hoe raak dit gelowiges (vgl Joh 1:1,3,4,12,14,18)?
 - b. Watter ironie sit daar in Johannes 1:10-11 en hoe word dit opgelos in Johannes 1:12?
 - c. Hoe sou dit jou lewe prakties raak as Jesus vandag by jou huis intrek en daar kom woon (dink aan jou gesinslewe, gesprekke, beroepslewe, gewoontes, ens)? Die boodskap van Johannes is dat Hy inderdaad by ons is ons leef net nie altyd so nie!
 - d. Watter implikasies het Jesus se *menswording* vir ons menswees?

In die eetkamer

7. Skryf neer (as jy wil) en deel met mekaar wat die Here vir jou gesê het deur die bespreking.

8. Gee geleentheid vir gebed.

Op die stoep

9. Sluit die byeenkoms af deur almal hardop saam die volgende seën uit te spreek (of laat iemand dit voorlees):

Dit wat ons hier ontvang het, gaan deel ons verder uit.

Ons gee ons hele lewe uit dankbaarheid.

As ons van hier af gaan, laat U ons nie alleen.

U het reeds belowe dat U ons sal seën.

Amen.

(nav Lied 311)

Jy kan hierdie week se video kyk by <http://youtu.be/NBHdxO8FeTQ>